



Inatsisartuni ilaasortaq
Pipaluk Lynge, Inuit Ataqatigiit

Inatsisartut suleriaasianni § 37 naapertorlugu apeqquteqaammut nr. 172/2023 Issittumi Siunnersuisoqatigiinni siulittaasuunermik Danmark-ip (Kalaallit Nunaatalu) tigusinissaat kiisalu Issittumi aallartitatut taaguut pillugu akissutit

Asasara Pipaluk Lynge.

Apeqqutigisannut qujanaq. Apeqqutitit uani ataani ataasiakkaarlugit issuarneqarput, akissuteqarfigineqarlutillu.

1. Issittumi Siunnersuisoqatigiinni siulittaasuuneq Danmarkip (Kalaallit Nunaatalu) 2025-mi Norgemit nangittussaavaa. Kalaallit Nunaatalu siulittaasuunerup nalaani siuttutut qanoq inissisimanissaanut piareersaatit aaqqiissutissallu suuppat?

Akissut:

Issittumi Siunnersuisoqatigiinni siulittaasuuneq maaji 2025-imi Norgemit Kunneqarfimmut Danmarkimut tunniunneqartussaavoq. Pissutsit assigiinngitsut arlaqartut Kunneqarfiup siulittaasuunerani suliassanik ingerlatsinissamik naatsorsuutigisanut akulerusimasussaapput.

Issittumi Siunnersuisoqatigiinni siulittaasuusarsimasunit Islandimit aamma Norgemit siulittaasuutitsisarsimanerannut atatillugu ilisimasanik katersinermik Naalakkersuisut suliaqarput. Tamatuma siunertaraa kalaallit tungitsinniit pissutsinik paasinninnsinni killiliussanik pilersitsinissaq, aningaasartuutissatut missingersuusiassatut naatsorsuutigisanut atatillugu, inunnik sulisussanik pisariaqartunik peqarnissaq, angalasarnernik, ataatsimiittarnernik aaqqissuussinernillu pisariaqartunik allanik ingerlatsisarnissanik, kiisalu siulittaasoqarfimmik ingerlatsinissatsinni tulleriarinissatut kissaatigineqartunut isumassarsiorumalluta.

Tamatumalu saniatigut aaqqissuussinikkut suliassanik agguataarinissanut, aningaasartuutissanik missingersuusiassanut, pilersaarutinut, ingerlatsisuusut qanoq taaguuteqarnissaannut suliassaannullu tunngatillugu nunatta Danmarkip Savalimmiullu akornanni atorfilittatigut oqaloqatigiinnernik ingerlatsisoqarpoq, kiisalu siulittaasoqarfimmik tigumminnissatsinnut tunngatillugu ataatsimoorussanik tulleriarinissatigut.

Naalakkersuisut iluminni naalakkersuisoqarfiit akornanni ataatsimiinnerit ingerlanneqartartussat pillugit pilersaarusiortut, kiisalu inuiaqatigiinni soqutigisaqatigiit assigiinngitsut kattuffii peqatigalugit ukiup nutaap aallartisimalernerani ataatsimiittarnissanik, ataatsimoorussatut tulleriarinerulersinnaasut Kunneqarfimmi siulittaasuutitsinermi qitiusussat oqaloqatigiissutigiumallutigit.

Naalakkersuisut siulittaasuutitsinissamut aggersumut piareersaataasunut tunngasunik Nunanut Allanut Sillimaniarnermullu Ataatsimiititaliamut ingerlaavartumik ilisimatitsisarniarput.

2. Issittumut Aallartitaq eqqarsaatigalugu aaqqiissutit suut Naalakkersuisut anguniarniarpaat?

Akissut:

Issittumi Aallartitatut atorfimmum atallugu atorfik Kunngearfiup issittortaanniit inuttalerneqartariaqartoq Naalakkersuisut tungaanniit isumaqartoqarmat Kunngearfiup iluani isumaqatigiinngitsosqarsimavoq. Tamannalu Kalaallit Nunaata, Danmark-ip aamma Savalimmiut Issittumi Siunnersuisoqatigiinni ingerlatarisaannut siunissamut sammisumik suleqatigiinnermut attuumassuteqarpoq. Kalaallit Nunaat Kunngearfimmi kisiartaavoq nuna issittumiittoq. Taamaattumik Naalakkersuisut pissusissamisoortutut isigaaq Issittumi Aallartitatut atorfimmik inuttaqartitsisoqassappat inuttaasup nunatsinneernissaa nunatsinnullu tunngasunik unammilligassatsinnut periarfissatsinnullu tunngasuni itisuumik ilisimasaqartuunissaa misilittagaqartuunissaalu. Atorfiit taaguutaannik tigumminnittuunissaq matumani kisimi pineqanngilaq, kisiannili suliat nammineq suussusiannut akisussaaneq aammalu Kalaallit Nunaata oqartussaaffiit oqartussaaffigilereersimasaanut nammineq akisussaanelu pineqarput. Ilanngullugulu Naalakkersuisut isumagaat Issittumi Siunnersuisoqatigiinni siulittaasuuffik Issittumiit isugineqartariaqartoq. Suli Danmarkimik nunarpullu pissutsit assigiinngitsut pillugit oqaloqatigiipput isumaqatiginninniarlutillu. Pisuni taakkunani Savalimmiut aamma peqataapput.

Inussiarnersumik inuulluaqqusillunga



Vivian Motzfeldt

Naalagaaffinngornissamut Nunanullu Allanut Naalakkersuisoq